

## Werk

**Titel:** Petri Artedi Synonymia piscium graeca et latina emendata, aucta atque illustrata

**Untertitel:** Sive historia piscium naturalis et literaria ab Aristotelis usque aevo ad seculum...

**Autor:** Artedi, Peter; Schneider, Johann Gottlob

**Verlag:** Weidmann

**Ort:** Lipsiae

**Jahr:** 1789

**Kollektion:** vd18.digital; Zoologica

**Werk Id:** PPN619946725

**PURL:** [http://resolver.sub.uni-goettingen.de/purl?PID=PPN619946725|LOG\\_0008](http://resolver.sub.uni-goettingen.de/purl?PID=PPN619946725|LOG_0008)

**OPAC:** <http://opac.sub.uni-goettingen.de/DB=1/PPN?PPN=619946725>

## Terms and Conditions

The Goettingen State and University Library provides access to digitized documents strictly for noncommercial educational, research and private purposes and makes no warranty with regard to their use for other purposes. Some of our collections are protected by copyright. Publication and/or broadcast in any form (including electronic) requires prior written permission from the Goettingen State- and University Library.

Each copy of any part of this document must contain there Terms and Conditions. With the usage of the library's online system to access or download a digitized document you accept the Terms and Conditions.

Reproductions of material on the web site may not be made for or donated to other repositories, nor may be further reproduced without written permission from the Goettingen State- and University Library.

For reproduction requests and permissions, please contact us. If citing materials, please give proper attribution of the source.

## Contact

Niedersächsische Staats- und Universitätsbibliothek Göttingen  
Georg-August-Universität Göttingen  
Platz der Göttinger Sieben 1  
37073 Göttingen  
Germany  
Email: [gdz@sub.uni-goettingen.de](mailto:gdz@sub.uni-goettingen.de)

## A P P E N D I X

## EXHIBENS

## HISTORIAM HIPPOPOTAMI VETERUM CRITICAM.

**P**rinceps de historia fluviatilis equi locus est *Herodoti* II. cap. 71. Equi fluviatiles, inquit, in praefectura Papremite sacri habentur, in reliquis non item. Specie sunt corporis hujusmodi. Quadrupedes sunt, sed pedibus fissis, ut in bovillo genere, facie sima, ( $\sigmaιμὸν$ ) juba equina, ( $\lambdaοφη$ ) dentes exsertos ostendit, ( $\chiαυλιόδοντας φαινον$ ) cauda et vox equina, magnitudo maximi bovis, corii tanta crassitudo est, ut ex siccato jacula fiant. ( $\xiυσὰ ἀκόντια$ .) Hoc cum loco si comparamus notitiam ab *Aristotele* proditam in *Hist. Anim.* II. 7. manifestum est, philosophum nihil fere aliud nisi historicum exscripsiisse, et si non nominatum. Equus, inquit, fluviatilis Aegypti jubarum ( $\chiαύτην$ ) habet ut equus, bisulcus est more boum, facie sima, talum etiam ut bisulla animalia habet, dentes paulum exsertos seu prominentes, ( $\chiαυλιόδοντας ὑποφαινομένας$ ) caudam suis, vocem equi, magnitudinem asini. Corii crassities tanta est, ut ex eo scuta fiant. Partes internae equo et asino sunt similes. In interpretando hoc loco *Gaza*, quem sequitur *Scaliger*, initium descriptionis cum verbis antecedentibus ita copulavit: Aliis mediocris rictus oris est, ut generi suum, equo fluviatili, quem gignit Aegyptus. Sed talem juncturam nec verba graeca, ut nunc ea leguntur, admittunt, nec versiones antiquae duae a Gallo *Camus* collatae tale quid habent. Qui *Scoti* versionem ubique sequitur *Albertus Magnus* II. p. 38. b. ita hunc locum philosophi interpretatur: quaedam sunt mediocris rictus, sicut porcus secundum omne genus suum. Quidam enim equus fluminis Nili, qui ab antiquis *Pegasus* non volans vocatur, moratur quidem superius in terra. Est enim hoc animal habens quidem pilos sicut pili equi, sed dividit ungulam in duo, et sunt sotulares ejus sicut sotulares vaccae, et attollit in sublime faciem suam, et in pedibus suis habet chahab, hoc est calcaneum tale sicut vacca cum duabus

duabus parvis unguis, quod non habet equus; et cauda eius est similiis caudae porci; sed cum vocat, (i. e. clamat) hinnit, sicut equus: sed magnitudo ejus est sicut magnitudo asini, habens corium spissum et grossum; ex ejus spissiore fiunt soleae calceorum, ex tenuiore fiunt corrigiae cingulorum. Interiora autem ventris ejus sunt sicut ea quae sunt in ventre equi aut asini: et hoc genus animalis est fissi labii inferius. In hac interpretatione insunt verba, quae annotationem brevem merentur. Primum de rictu nihil habet simile versioni *Gazae*; verum ipsa orationis series rictus mentionem desiderare videtur. Totum enim caput de forma oris diversa in animalibus diversis tractat. Quodsi filum orationis secutus de suo rictum mediocrem inferuit, graviter erravit; is enim in hippopotamo immanis est, ita ut qui sola *Gazae* versione hucusque usi fuerunt viri docti, certatim *Aristotelem* reprehenderent. Igitur suspicabimur potius in junctura orationis mentionem rictus equi fluviatilis excidisse. Quod deinde  $\chiαιτην$  simpliciter pilos non jubam vertit, in eo quidem proprius ad naturam hippopotami accessisse videri posset, si scilicet comparationem pilorum hippopotami cum juba equi ita institutam esse dicamus, ut crassities et rigor spectentur. Etsi enim usus loquendi jubam in equo, asino, bonaso aliisque intelligi voluerit, ubi  $\chiαιτη$  nominatur, poetis tamen etiam vocabulum idem de crinibus hominum usurpatum legitur. Atque omnino  $\chiαιτη$  pili prolixiores in homine et animalibus dici videntur. In hippopotamo etiam adsunt in collo adeoque in dorso pili rari longiores, quam in reliquo fere depili corpore, longissimi tamen in mento conspicuntur. Porro usus corii ab *Alberto* longe alias traditur quam in Codice graeco, ubi hastae,  $\deltaορατα$ , nominantur. Versio anonymi antiqua a *Camus* inspecta  $\vartheta\omega\varphi\alpha\kappa\alpha\varsigma$  legit; posuit enim: *ut scuta fiant ex ipso*. Contra *Scoti* versio: *parantur ex eo fotulares corrigiae*. ubi ex *Alberto* legendum esse: *fotulares et corrigiae*: clarum est. Atque ita etiam habet versio a *Vincentio* XVII. cap. 37. posita. Pro vulgata lectione stare videntur nominata ab *Herodoto*, quem sequi videtur *Aristoteles*,  $\xi\upsilon\varsigma\alpha\alpha\kappa\sigma\tau\alpha$ . *Plinii* interpretatio dubia est. Is enim XI. 39. vulgarem lectionem expressit dum ait: crassitudo talis ut inde tornentur hastae. Sed idem VIII. 25. hippopotamus, inquit, tergoris ad scuta galeasque impenetrabilis. Postremo autem hoc in loco manifeste interpretatus est locum totum *Aristotelis*; quare non dubitandum puto, quin in suo Codice  $\vartheta\omega\varphi\alpha\kappa\alpha\varsigma$

*κέρας* forte etiam *κόρυθας* legerit; altero vero in loco *Herodoti* locum expresserit. Eadem *Plinii* interpretatione confisus *Sylburgius* θώρακας, *Scaliger* autem *κόρυθας* rescribendum censuit. Dentium denique exsertorum mentionem omittere *Scoti* versionem annotavit *Camus*. Fecit idem *Albertus*; sed is labii fissi inferius esse hippopotamum addit; quod additamentum puto etiam in *Scoti* versione ex Arabico facta exstare, et si annotare id omisit, ut alia multa, *Camus*. Forte etiam *Albertus* marginem labii inferioris leviter excisum seu sinuatum ab exerto dente, quale in apris conspicitur, intelligi voluit.

Etsi vero posui *Aristotelem* exscriptisse verba *Herodoti*; quam quidem opinionem summa verborum et notitiae similitudo confirmare videtur; obstat tamen ei evidentur, quae diversa partim leguntur in loco philosophi; alia vero plane non sunt in *Herodoto*. Ita hic caudam equi, et bovis maximi magnitudinem, ille vero caudam porci et asini magnitudinem assignat hippopotamo. Difficile est hanc diversitatem a librarii errore in *Herodoti* libris omisso derivare; addit enim *Aristoteles* mentionem tali, qualis in ruminantibus tantum ex vera *Aristotelis* sententia reperitur; de talo vero tacet *Herodotus*. Atque ex hac tali mentione, si profectam a propria *Aristotelis* observatione dicere licet, plane conficeretur hippopotamum ad animalium ruminantium classem pertinere; quo ducere etiam forma ventriculi quadruplex a recentioribus reperta videtur. Verum statim subdit *Aristoteles*, quod in *Herodoto* non magis adeat, inferiores partes esse tales, quales in equo et asino reperiantur. Atque ita fere tollitur id quod ante positum est. Talo enim proprie dicto equus et asinus carent, nec iidem ruminant, ut animalia talo instruta. Hac igitur in summa dubitatione nihil aliud mihi succurrit, quo non defendam quidem *Aristotelem*, sed notitiam in multis rerum argumentis sibi contrariam excusem, nisi ut dicam, philosophum notitiam alienam secutum de hippopotamo tradidisse. *Herodotum* primum ejus notitiae fuisse auctorem summa verborum similitudo, orationis et rerum series eadem suadent; sed videtur eadem deinde ab aliis fuisse repetita et paulum aucta; hacque recentiore usus esse videtur *Aristoteles*. Tali partiumque internarum mentio videtur quidem illa probabilem facere opinionem, fuisse ab ipso philosopho animal accuratius inspectum; verum in asino Indico cornuto, quem

aliunde nisi ex *Ctesiae* traditione cognitum non habuit, solidipede talum etiam commemorat; atque alibi in peregrinis animalibus partium internarum formam annotat, quae ex relatione sociorum Alexandri cognita tantum potuit habere, et si nullum eorum uspiam nominat. *Herodotum* vero aliquoties nominat errorisque arguit; quod sine dubio etiam in notitia hippopotami fecisset, nisi ex recentiore aliquo scriptore, qui Alexandrum in Itinere Indico et Aegyptiaco fuerat secutus, duxisset eam. Ipse vero hippopotatum vidisse nunquam videtur; alias ingenium hominis perspicacissimum a forma animalis singulari non potuisset tam longe aberrare! Omnia optima est explicatio difficultatis hujus, quam nobis affert annotatio *Porphyrii* apud *Eusebium* in Praeparatione Evangelica X. p. 466. *Herodotum* hippopotami et phoenicis avis descriptionem cum crocodilorum capture paucis verbis immutatis ex *Hecataei Milesii Periegesi* transstulisse. Atque ita etiam appetet unde *Aristoteles*, quae diversa et plura tradit, ducere potuerit.

Praeter locum jam positum, de quo hucusque disputavi, duobus aliis nominat hippopotamus. Alter est Hist. Anim II. 1. ubi hippopotamus cum ove, capra et cervo inter animalia bisulca nominatur. Tertius est VIII. 2. ubi equus fluviatilis ut testudo marina, crocodilus et phoca ab aquis separata durare et vivere posse negatur. Quam opinionem *Bellonius* exemplo hippopotami ejus, quem ex Aegypto adductum Constantinopoli viderat, quemque per duos aut tres annos aquis prorsus caruisse ait, conatur refutare. Atque omnino ex iis, quae recentiores itineratores de hippopotamis mansuetis tradiderunt, licet conjicere, diutius hoc animal sine magna sanitatis noxa aquis carere posse, quam phocam et crocodilum; quoniam phoca cum crocodilo piscibus in primis et aquatilibus animalibus vivitat; hippopotamus contra ambigui victus et carne et herbis vesci creditur.

Tertius notitiae de hippopotamo traditae auctor ignotus hodie nomine est; cuius locum *Diodorus Siculus* in libro primo bibliothecae suae historicae excerptis T. I. p. 42. ed. Weselingii. Is igitur ita tradit. Nili qui dicitur equus magnitudine quidem est non minor cubitis quinque, quadrupes, et fissis ungulis, uti boves; dentes expertos et maiores apris feris habet, ternos utrinque, aures, caudam et

voce in

vocem equi, reliquam vero totam corporis molem (*κύρος σώματος*), non dissimilem elephanto, corium omnium fere animalium crassissimum est fortissimum. In aquis et terra simul degit; interdu quidem aquas incolit, et in fundo exercet se, noctu vero egressus in terra sata et herbas depascitur; ita ut si bellua haec multipara esset et singulis annis pareret, ingentem agris Aegyptiorum afferret calamitatem. Ad hanc primam loci partem paulum temporis subsistam. Magnitudo cubitorum quinque videtur ad altitudinem referenda esse, et arguit pullum nondum perfecta aetate conspectum fuisse a notitiae auctore. Quae deinde reliqui corporis cum elephanto instituitur comparatio, ad colorem et naturam corii depilem et glabram referri fine dubio debet. Ungulas bifidas, caudam et vocem equinam jam supra in *Herodoto* aut, si mavis, *Hecataeo* vidimus. Aures equinae non magis commode quam cauda equina hippopotatur. Dentes exserti proprie dici quidem non possunt ore clauso, sunt tamen assignantamen incurvati ut in apri, sed multo maiores. Quod vero ternos utrinque ponit auctor, videtur inferioris maxillae quatuor incisores dentes, forma et situ a reliquorum animalium omnium dentibus discrepantes, et veluti jacentes, sed rectos, cum caninis incurvatis numerasse, qui proprie *χαυλιόδοντες* dici possunt. Denique quod subdit hippopotamum non esse multiparum, confirmatur observatione recentiorum scriptorum, qui foetum unum belluae esse consentiunt. Dubium vero est unus an plures anni inter partum unumque intercedant; difficilis etiam ejus rei observandae videtur esse occasio et rara!

Capturae modum *Diodorus* hunc tradit. Capitur, inquit, multorum hominum opera, qui ferreis contis aut embolis (*έμβολοις*) belluam cedunt. Ubiunque enim apparuit, congregantur undique circa eam navigia, et homines circumstantes hippopotamum vulnerant quasi caelo aliquo ferreis hamis adjuncto, cui aptum atque insertum principium seu caput stupeorum vinculorum immittunt belluae ex vulnere furenti, donec sanguinis profluvio defecerit. Carnem habet duram et difficilem digestioni, interaneorum vero nihil plane, nec viscera nec intestina, possunt comedи. Videtur igitur capture similis fuisse ei, quam hodie in balaenarum venatione adhibent. Caelum aliquod ferreum, seu telum acumine latiore, ut *κοπεύσι*,

*πεὺς*, seu instrumentum illud, quo marmorarii incident marmor, utrinque hamatum videtur additum atque insertum habuisse manubrium ligneum, quo projici telum posset in belluam. Simul telo insertum haerebat principium stupearum cordarum, quas belluae auffugienti immittebant; deinde vero ubi sanguine multo effuso defecebat iisdem cordis in navigiis retentis ad litus imbellem hippopotamum pertrahebant. Volui haec copiosius explicare, quoniam postremum *Diodori* editorem a sensu vero hujus loci aberrasse videbam.

*Nearchus*, Alexandri dux et socius in itinere Indico, eumque fecutus *Eratosthenes* in Indo fluvio reperiri hippopotamum negarat; contrarium asserebat *Onesicritus*, idem Alexandri socius, uti refert *Strabo Geographiae XI. p. 1012. et p. 1033.* Cum *Nearcho* facit *Pausanias* postea laudandus; cum *Onesicrito Philostratus* in vita *Apollonii*, et *Nonnus* in *Dionysiacis*. *Strabo* etiam in extrema Africae ora circa Licham paludem aliquam dulcis aquae hippopotamos et crocodilos alere ait libro XVI. Bambotum amneum juxta Atlantem Africae crocodilis et hippopotamis refertum esse tradit ex *Plinio V. cap. 1. Solinus cap. 27.* Male igitur scriptores aliqui ignobiles, veluti *Philostratus* et *Solinus* in solo Nilo et Indo hippopotamos nasci asseruerunt. De Indo dubitare jubet silentium itineratorum recentiorum omnium; et qui solus illis contrarium de Asia tradit *Michael Boym* in *Flora Sinensi* 1656 nullam fidem reperiit apud illum *Buffonum*.

Accedimus nunc ad quartum notitiae de hippopotamo traditae auctorem *Plinium*, quem sua ex aliena auctoritate ubique duxisse constat. Is igitur libro VIII. c. 25. Major, inquit, altitudine (quam crocodilus) in eodem Nilo bellua hippopotamus editur, unguis binis, qualis bobus, dorso equi et juba et hinnitu, rostro resimo, cauda et dentibus aprorum aduncis, sed minus noxiis, tergoris ad scuta galeasque impenetrabilis, praeterquam si humore madeat. Hanc priorem notitiae partem ex *Aristotele* traductam esse vix dubitari posse videtur, ita omnia plane convenient. Pro rostro resimo *Isidorus*, Auctor gallicus de rerum natura et *Vincentius XVII. cap. 136.* ponunt *resupinum*; caudam *tortani* habet *Vincentius*, *tortuosam* *Isidorus*, adeo ut in *Plinio* vocabulum *torta* excidisse debeat, quod monuit etiam *Conr. Gesnerus*; sed *Harduinus* de ea varietate plane tacet.

racet. Verba postrema: *praeterquam si humore maledat*: arguere videntur *Plinium* in *Aristotele* legisse εξ αὐτοῦ, ubi hodie εξ αὐτοῦ legitur. Cautelam eandem iisdem etiam verbis annotavit *Herodotus*; itaque *Plinii* lectionem praferendam esse non dubito.

Aliunde sumta sunt, quae subdit *Plinius* his verbis: Depascitur segetes destinatione ante, ut ferunt, determinatam in diem, et ex agro ferentibus vestigiis, ne quae revertenti insidia comparentur. His in verbis olim nocte fuisse lectum ante verbum depascitur, infra demonstrabo. De pastu eadem tradit *Nicander*, poeta Colophonius, in Theriacis versu 565 seqq. ubi medicinam aliquam ex testiculis hippopotami contra venenum serpentum prescribit. Is igitur belluam in Nili paludibus coenosis super Saiticam praefecturam colloccat, et in terram egredi ut segetem viridem et teneram, retrocedens usque, depascatur. Eadem de pastu tradit *Aelianus* de N. A. V. 53. Quod vero *Nicander* habitationem hippopotami removet super Saiticam praefecturam, Delta seu parte humiliore Aegypti inclusam, hoc mihi arguere videtur animal jam tum terrefactum non tam profunde in Aegyptum cum aquis Nili crescentibus descendisse ut antea; *Herodotus* enim in praefectura Papremite, inclusa Delta, sacros haberi, copiosos igitur esse, afferuit.

Reliquam nunc audiamus *Plinii* narrationem. Primus eum, inquit, et quinque crocodilos Romae aedilitatis suae ludis M. Scaurus temporario euripo ostendit. Hippopotamus in quadam medendi parte etiam magister exstitit. Affidua namque satietate obesus exit in litus, recentes arundinum caesuras speculatum, atque ubi acutissimum videt stirpem (stipitem *Vincentius* cum *Solino* cap. 32.) imprens corpus quandam in crure venam vulnerat, atque ita profluvio sanguinis morbidum alias corpus exonerat, et plagam limo rursus obducit. Eadem retulit etiam *Amianus Marcellinus*, cuius locum infra ponam. Is cum ultra animalia reliqua ratione parentia hippopotatum sagacissimum dixit, manifesto respexit ad locum *Plinii* XI. cap. 39. ubi de corii crassitudine est; deinde *Plinius* subdit: et tamen quaedam ingenio ejus medica diligentia est. Nempe ad ingenii sagacitatem traxit supersticio, quod ex viclus ratione accidere saepe hippopotamo necesse erat. Habitans enim in paludibus inter densas arundines, quotiescumque in terram egredi pastum cupit,

viam sibi sternere arundinetis intercisis cogitur, atque ita pedes in gressu stipitum acumine saepe vulnerantur.

Praeterea *Plinius* singulares aliquot partes hippopotami |commemorat; veluti dentes exsertos, ut apro et elephanto; XI. cap. 37. pellem frontis e parte sinistra in medicina laudat XXXII. cap. 10. Nympharenam gemmam dentibus hippopotami similem ait esse XXXVII. cap. 10. Denique libro 38. cap. 8. est, inquit, crocodilo cognatio quaedam amnis ejusdem Nili geminique victus cum hippopotamo — plurimi autem super Saiticam praefecturam. Hujus corii cinis — adeps — fimus — dentes, pellis et testiculi in medicina laudantur; sanguine pictores uti dicuntur. Apparet hunc locum ex medico aliquo graeco haustum esse, ex quo sua etiam derivaverat *Nicander* poeta supra laudatus. De victu quod annotat *Plinius* aliena auctoritate, arguit hippopotatum ut crocodilum in animalia etiam aquatica et terrestria dentibus grassari. Atque ita hippopotatum carnivorum simul et herbivorum a scriptoribus vetustis tradidimus. De sanguinis usu, quem acceperat *Plinius* traditum, narratio nondum certior est auctoritate *Frid. Bollingii* in Itinerario, qui sua ex *Plinio* duxisse videtur; quemadmodum *Ionstonus* aliisque *Plinii* locum interpretatione sua adulterarunt.

Communem mari, amni et terrae hippopotamū ut etiam crocodilum tradit *Plinius* XXXII. cap. 11. De crocodilo falsam esse narrationem, hodie satis constat; hippopotatum tamen interdum etiam in mari, fluviorum ostiis vicino conspectum esse affirmant Cl. *Sparrmann* et *Gordon*. Quanquam victimum aquatilem sequi potius puto, cum ultra aquas dulces evagatur et mare ingreditur.

Postremus supereft *Plinii* locus IX. cap. 12. ubi, alia, inquit, animalia aquatilia corio et pilo integuntur, ut vituli et hippopotami, alia corio tantum ut delphini. Gravem hic recentiorum reprehensionem incurrit *Plinius*, quod equum fluviatilem aequo pilis vestitum habere corium dixit atque vitulum marinum seu phocam. Excusare errorem non ausim; sed suspicor in eo loco latere aliquem librarii errorem. Totus ille *Plinii* locus ex libris *Aristotelis* contractus est, ut comparanti fiet manifestum; verum de hippopotami corio nihil tale hodie in philosophi libris legimus. Forte sult in illo loco

loco olim nomen lutrae aliquod, aut alias aquatrici animalis pilosi. Vix tamen opera est *Plinii* errori uni excusationem quaerere, cum milenos alios ab ipso auctore profectos confiteri necesse sit!

Post *Plinii* aetatem quae tradiderunt scriptores veteres graeci et latini partim repetita sunt ex antiquioribus auctoribus, multa vero ex religionibus Aegyptiorum et variis hieroglyphicarum litterarum interpretationibus, denique ex studio immani mysticae theologiae fluxisse videntur. Pauca modo veritatis vestigia in horum scriptorum notitiis impressa vix hodie agnoscere licet. Ita quod tradit *Aelianus* de N. A. VII. 19. cum *Plutarcho* de Solertia animalium p. 962. hippopotatum a natibus occidi adultis, ut matrem ineant, *Porphyrius* etiam de Abstinentia libro tertio repetiit. Quam quidem observationem vereor ut unquam homines curiosi in fera immani et libertate sua fruente recte capere potuerint; contra ex sacerdotum fabulis Aegyptiacorum et interpretationibus monumentorum hieroglyphicorum veterum ortam esse suspicor. Immanitatis enim et violentiae argumentum et signum manifestum reperisse sibi videbantur in hippopotamo Aegyptii; ideoque in sceptris regiis ciconiam sculpere solebant in summo, hippopotatum autem in infimo, quo significanter justitiae violentiam parere debere, tradente antiquo Scholiaste *Ariophanis* ad Aves versu 1356. et ex eo *Suida* sub voce ἀντιπελαργεῖν. De Aegyptiis scilicet regibus interpretor, quod ille de regiis sceptris simpliciter tradit; ita enim suadet non solum gentis istius mos et amor symbolorum, verum ipsa hippopotami patria et natura praeter Aegyptios aliis hominibus vix rite cognita.

*Pausanias* Aeliano suppar aetate graecis historiis, quas ab eo scriptas habemus, pauca tantum inseruit de equo fluviatili, quae collecta hic ponam. In Messeniacis igitur Nili equos hominibus aequem malos et nocivos esse refert ac crocodilos. p. 364. Simul etiam monet in Indo fluvio hippopotamum non reperi. Alibi hippotamis et apri dentes exsertos inferiorem maxillam proferre ait p. 403. Denique matris Dindymenae simulacrum apud Proconnesios aureum fuisse refert, cuius facies pro ebore fuerit facta e dentibus equorum fluviatilium, in Arcadicis p. 694. Hippopotamorum coria eti sola cum ebore et rhinocerotum cornibus ab Aethiopibus ad emporium Adulitanum de lata et in Graeciam inde, Asiam et imperium romanicum

num translata et vendita fuisse tradit *Plinius VI. c. 29.* dentes tamen hippopotamorum etiam commercio illi fuisse commissa licet ex allato *Pausaniae* loco arguere. Atque hanc suspicionem confirmat narratio *Cosmae*, *Indopleustae*, Seculo sexto medio qui librum suum publicavit, XI. cap. 7. ubi equum fluviatilem vidisse quidem ipse negat, sed habuisse testatur dentes ejus, pondere tredecim libras aequantes, quos in patria redux vendiderit. Multos ejusmodi dentes in Aethiopia et Aegypto vidisse se addit; ex quo studiose collectos fuisse manifesto intelligimus.

Nomen hippopotami paulum immutatum fuisse hac fere aetate discimus ex *Oppiani* carmine de Venatione III. versu 251. et sequentibus. Hic enim quam sub nomine equi feri (*ἱππάγος*) Aethiopici tempore Alexandri Severi descripsit feram, nullam esse aliam quam reliquorum scriptorum veterum hippopotum, diu suspicatus eram antea, quam eandem placuisse opinionem viderem postremo *Oppiani* editori Gallo, *Iac. Nic. Bellin de Ballu*. Ita enim omnia, quae trahuntur de equo fero hoc, plane convenient cum notis hippopotami a vetustioribus auctoribus editis, ut nominis diversitas neminem nisi naturae rerum plane ignorarum morari possit. Est, inquit, in confiniis terrae Aethiopum genus copiosum equorum ferorum, armatum dentibus duobus exsertis venenatis; pedes non solidi, sed in unguis fissi sunt, ut cervis; juba a collo per medium dorsum in caudam usque excurrit; servitatem hominum non patitur, sed si quando captum fuerit animal laqueis fortissimis ab Indis seu Aethiopibus, cibum et potum pertinaciter detrectat. Verum supereft in graecis poetae verbis difficultas, quam annotare et tollere omisit Gallus, et si omnem ea conjecturam de hippopotamo poterat refutare. Patria enim beluae his indicatur verbis: ἐσι δένι χρημαῖς ἐπὶ τέρμασιν Αἰθιοπίων; quae nullo alio interpretari licet modo, nisi feram hanc habitare praecipitia montium vicinorum Aethiopiae. Quae quidem habitatio quam sit a natura fluviatilis equi aliena, non opus est copiose declarare. Sed bene succurrit varietas scripturae e Codice Veneto et Vaticano enotata, ubi legitur: ἐσι δὲ εὐκοήμνοις ἐπὶ τέρμασιν Αἰθιοπίων, i. e. in confiniis montium Aethiopiae altorum et praecipitum. Atque ita hippopotamus ad superiorem et vicinam praeruptis Aethiopiae montibus Aegypti partem relegatur.

Post *Oppianum* spatio satis longo interceptus temporum *Ammianus Marcellinus* solus occurrit, qui hippopotami meminit in praeclaro historiarum romanarum opere, quod ad imperatoris Valentis interitum usque deduxit. Is igitur in libro vigesimo secundo, ubi Aegypti miracula singularesque animalium formas enarrat, hippopotami etiam naturam tradidit capite 15. Totus dignus est locus, qui apponatur. Hippopotami quoque, inquit, generantur in illis partibus, ultra animalia cuncta ratione carentia sagacissimi, ad speciem equorum, bifidas habentes ungulas caudasque breves; quorum solertiae duo interim ostendere documenta sufficiet. Inter arundines celsas et squantes nimia densitate haec bellua cubilibus positis otium pervigile studio circumspectat, laxataque copia (arundinum) ad segetes de- pascendas egreditur. Cumque jam coeperit redire distenta aversis vestigiis distinguit trainites multos, ne unius plani itineris lineas insidiatores secuti repertum sine difficultate confodiant. — Has monstruosas antehac raritates in belluis in aedilitate Scauri vidi romanus populus primitus — et per aetates exinde plures saepe huc ducti nunc inveneri nusquam possunt, ut conjectantes regionum incolae dicunt, insectantis multitudinis taedio ad Blenniyas migrasse compulsi. In his, et si ipsa belluae notitia brevis et ex antiquioribus auctoribus translata est, duae tamen res annotatione dignae mihi videntur. Primum quidem quod post aedilitatem Scauri hippopotatum saepius populo romano in Circo spectandum fuisse exhibitum ait, licet id confirmare multis veterum historicorum testimoniis. Hippopotatum et rhinocerotem primum Romae visos Augusto de Cleopatra triumphante scribit *Dio Cassius* T.I. pag. 655. Verum ea in re majorem *Plinio* fidem habeo, qui hippopotatum jam antea in aedilitate Scauri Romae spectatum fuisse, adstipulante *Ammiano Marcellino*; rhinocerotem vero unicornem in ludis Pompeji populo exhibitum fuisse tradit libro VIII. cap. 20. Commodum quinque hippopotamos interfecisse tradit idem *Dio* T.II. p. 1211. ed. Reimari. Deinde sub Antonino Pio et Gordiano crocodilos et hippopotamos spectatos Romae fuisse refert *Iulius Capitolinus*. Praeterea Heliogabalum hippopotamos habuisse narrat *Lampridius*. Denique *Calpurnius*, poeta ex aevo imperatoris Cari, Ecloga VII. versu 66. spectatum Romae canit hippopotatum:

Kk

Spectavi,

Spectavi, inquit, vitulos, et equorum nomine dictum  
Sed deformis pecus, quod in illo nascitur amne,  
Qui sata riparum vernantibus irrigat undis.

Plura et si testimonia scriptorum hodie non exstant, vel ea tamen ipsa, quae posui, satis demonstrant, quam curiose genus hoc belluarum ad ludos in circo romano fuerit conquisitum. Unde non mirum accidere nobis debet, si de raritate ejus sua aetate conqueritus est *Ammianus*. Idem enim olim in leonibus, pantherisque accidisse accepimus, has enim feras curiosa nimis romanorum magistratum investigatio ex tota fere Asia minore fugatos in interiores Asiae Indiaeque partes abscedere compulerat. Quid? quod imperante Iuliano jam *Themistius*, rhetor, Oratione 20. conquestus est in Libya proventum elephantorum, in Thessalia leonum, in paludibus vero Nili equorum fluviatilium defecisse. Nec erat cur raritatem animalis in Aegypto ab usu pulveris pyrii et sclopotorum arcesseret, qui praeterea nulla auctoritate hippopotamum marinum a fluviatili distinguit, *Sonnini* in Ephemeride Physic. edita a *Rozier* anno 1786. Ianuario p. 66. Merito igitur scriptorum romanorum socordia accusari potest, qui nihil posteritati de forma hippopotami Romae tam saepe spectati tradiderint!

Tandem vero exstitit subito scriptor historiae amatoriae, *Achilles Tatius*, Alexandrinus, qui accuratiorem hippopotami notitiam prodiceret et talem, ut in ea belluam nobis notam sub eodem nomine agnoscere liceat. Is igitur libro quarto p. 221. editionis Salmasianaee 1640. animal fluviatile dicit et ab Aegyptiis equum Nili appellari ait. Est quidem, inquit, equus, uti fama fert, in ventre et pedibus, nisiquod pedes in ungulas fissos habet, (*ἐν χηλῇ σχίζει τὴν ὄπλην*) magnitudine maximi tauri, cauda brevi et pilis nuda, uti reliquum etiam corpus omne; caput rotundum nec parvum, genae equinis similes, (*ἔγγυς ἵππος παρειαῖ*), male versio: maxillae fere equinae) nares magnopere hiantes et patulae, igneum vaporem exspirantes, maxilla (*γένυς*) lata, aequalis genis, (*ἐνθεῖα ὥστε νοῆ παρειαῖ*). versio: mentum latum, quemadmodum etiam maxillae: sed bene *Salmasius* emendare videtur (*ὅση νοῆ παρειαῖ*) rictus oris ad tempora usque rescissus, canini dentes incurvati, forma et positione equinis similes,

similes, sed triplo longiores. Deinde addit capturae rationem. Esse animal voracissimum, quod segetem campi facile una coena depascatur; ex eo in insidias incidere. Observato enim ejus cibili fossam excavari, arundine et terra cooperiri, subjecta arundinibus cavea lignea, cuius fores in superiore parte ad foveae tectum sint apertae, et belluam decidentem excipient. Venatores tum accurrere, fores claudere et praedam captam auferre. Vi nunquam debellari; esse enim praeter fortitudinem eximiam etiam corio admodum duro, ut a ferro non laedatur. (Graece legitur  $\tau\varphi\alpha\chi\nu$ , asperum; sed  $\pi\alpha\chi\nu$  legendum puto; quae voces in libris scriptis saepissime permutatae reperiuntur.). Vides igitur hic equi similitudinem esse ad ventrem et pedes translatam; nullam juba equinae aut hinnitus mentionem fieri, caudam brevem et depilem, et reliquum etiam corpus omne depile tradi, cum *Plinius* pilis tectum temere posuerit. Sed reliqua notitiae praeclarae argumenta paulo post copiosius explicabo. Notitiam ipsam aliunde nec ex ipsius animalis visu duxisse *Tatium* arguunt verba in ipso orationis initio posita:  $\omega\varsigma \delta\lambda\gamma\sigma \beta\delta\lambda\epsilon\tau\alpha\jmath$ . i. e. uti narrant, tradunt. Hanc eandem notitiam ex *Tatio* excerptam miris modis interpolavit *Eustathius*, Antiochenus, in Hexaemero ab Allatio edito p. 21. cuius locum ex Codice manuscripto antea non editum, sed minus integrum, posuit *Bulenger* in libro de Circo romano et ludis Circensibus *Graeviano* antiquitatum romanarum thesauro inserto. Quod cum non animadvertisset nuperus *Oppiani* Editor Gallus, iterum nobis locum *Eustathii* varie corruptum ex libro *Bulengeri*, tanquam egregium inventum, venditare voluit in notis ad *Oppianum* p. 333. Sed operae est pretium, singulas varietates inquirere, ut uno eoque insigni exemplo constet, quam turpiter lapsi sint scriptores plerique christiani graeci, cum graecorum gentilium libros excerpterent, ipsa vero rerum argumenta plane ignorarent. Simul etiam aevum *Tatii* ex imitatione vel potius compilatione *Eustathii* comperiemus. Hic enim Constantino Magno coaevis fuit; ad eadem igitur saltim tempora retrahenda erit *Tatii* aetas hucusque incompta. Nam de ipso furto dubitare nemo potest, qui graeca utriusque scriptoris verba comparaverit, et satis aliunde jam cognoverit, qua fere ratione compilatores alienae eruditionis copias contrahere et contractas interpo-

lare et corrumpere soleant. Caudam igitur hippopotami *Eustathius* dicit crassam pro brevi; sed forte librarius aberravit, dum παχεῖα pro βραχεῖα scribebat; deinde maxillam planam (πλατεῖα) pro lata; (ἐνθεῖα). Dentum in ore triplicem seriem adesse ait, duobus aprorum in morem incurvatis; (οὐδέσι δὲ ἔνδον τριχῶς πεπύκνωται), sed hoc augmentum debetur stupori *Eustathii*, qui verba *Tatii*: τὸ δὲ μέγεθος εἰς τριπλάσιον, de triplice dentium serie interpretatus est, cum de triplice magnitudine dentium cum equinis comparatorum explicare deberet. Denique cum *Tatius* pedum ungulam simpliciter fissam dixisset (τὴν ὄπλην σχίζει ἐν χηλῇ.) *Eustathius* contra in libro *Bulengeri* posuit τὴν ὄπλην σχιστὴν ή διθηλήν. ubi διχηλήν emendabat Gallus in notis ad *Oppianum*; itaque ungula bifida diceretur. Verumtamen cum in *Allatii* editione clare scriptum exstet ὄπλην σχιστὴν ως χηλὴν, malo librarii errorem in libro *Bulengeri*, quam ipsius *Eustathii* errorem arguere. Formam ungulae cum nulla bovis aut cervi addita comparatione declaraverit *Tatius*, licet ungulam graece χηλὴν dictam sensu etiam latiori interpretari, et ipsam hippopotami notitiam hac etiam in parte cum natura ipsa et veritate in concordiam redigere. Χηλὴν enim non solum de equi ungula solida *Hesiodus*, sed de avium etiam digitis et unguibus *Sophocles* et *Euripides* adhibuerunt; quanquam poetis plus in vocabuli significatione insolentiori licere quam scriptori prosaico facile largior.

Post ea tempora nullum equidem reperi huicdum scriptoris locum, qui hippopotami notitiam prodiderit; praeter eum, quem supra ex seculi sexti scriptore *Cosma laudavi*. Vix enim dignus est locus *Nonni*, Panopolitani, qui memoretur ex libro XXVI Dionysiacorum, versu 13 et sequentibus, ubi hippopotamus Indi aequa ac Nili incola natare dicitur aquas findens ungula nigra; sed verba graeca ὄπλῃ μελαμψηφίδι sunt difficilia atque omnino inepta. Praeterea illi maxillae longae (*μηνεδαναὶ γενύες*) assignantur; et in litore dentibus ferratis materiem et arundines secare, (*αιχμῇ καρχαρόδοντι διασχίζων γάχυν ὑλης*) dentibus vero in modum falcis curvatis fegentes demetere dicitur. Seculo demum tertio et decimo, ubi bonae litterae redivivae editis *Aristotelis* optimorumque scriptorum quo-  
rumque

rumque graecorum veterum versionibus illustrari cooperant, reperio auctorem Gallicum libri de natura rerum, quem excerpit *Vincentius* XVII. cap. 115. quaedam de equo fluviali tradidisse, vetustis fabulis commixta, quae ex recentiori aliqua notitia ducta esse videntur. Ponam igitur verba ipsa scriptoris ex capite laudato *Vincentii* quod *de equo marino et equonilo et equo fluminis* inscriptum est. Equus marinus, inquit, est monstrum fortissimum, nihil extra aquam potest, ut dicit Aristoteles, sed statim, ut aquarum caruerit natura, carabit et vita. Aliorum piscium carnibus vivit. In pugna crudele est, sed hominem timet, et contra eum patiri bello formidat. Equonilus, ut dicit Michael (*nescio Ephesus an Scotus intelligatur*) monstrum est ingens ac ferocissimum, in Nilo habitans. Crura, pedes et unguis habet, ut crocodilus, sed multo majora. Humanarum mortuum cupidissimum est: nam cum ei navis in portu occurrerit, unum pedem in terra figens, altero navem in anteriori arripiens facillime scindit, vel inclinatam aliquando mergit. Unde in locis, in quibus habitat, immanis multitudo hominum perditur per eum, sed hoc malum rarissime invenitur. Nullis capi posset instrumentis, nisi rete ferreo ex catenis apud Damascenos in hoc opus fabricato. Captum quoque malleis tantum ferreis occiditur. Pellis ejus unius cubiti spissitudinem habere dicitur, tantaeque esse duritiae, ut nullo jaculo et armatura penetrari possit. Equus fluminis, ut dicit Aristoteles, est monstrum in oriente, forma mirabili, sublimis facie. Crines habet ut equus, pedes fissos et sotulares ut vacca, caudam ut porcus. Corium ejus valde crassum est: interiora ejus, ut equi: magnitudo autem ut asini: hinnit ut equus, in terra et in aquis aequaliter manere dicitur. Deinde idem *Vincentius* cap. 136. alium ex eodem libro locum ponit, ubi leguntur haec: Hippopotamus est bellua in terra nascens, sed in aqua et terra aequaliter potens. Elephantibus plerumque major. Rostrum habet resupinum, dentes aduncos, noctibus segetes depascit, ad aquas quasi retrogradus pergit, libentius autem praeceteris partibus corporis in pedibus vulnera accipit.

In Nilo habitat et in partibus Indiae praecipue reperitur; ex ejus cute tornantur hastae. Non opus esse puto, ut operose distinguam, quae nova hic accessisse videntur, nescio ex quo fonte; facile enim ipse le-

ctor animadvertisit ea omnia. Quod vero scriptor hic cum *Isidoro* et *Solinio* die in aquis manere hippopotamum, noctu vero egressum vicinas segetes depasci tradit, sine dubio secutus est varietatem aliquam lectionis in *Plinii Codicibus* olim exstantem, ubi forte scriptum fuit: *Nocte depascitur segetes, destinatione ante, ut ferunt, determinans in diem.* Quod vero gallicus scriptor bis de eadem bellua sub diverso nomine tradit, id ex ordine alphabetico est explicandum, quo librum suum concinnaverat. Igitur diversa belluae nomina per singulas litteras dispensavit. Priorem ejus locum exscripsit *Albertus* libro XXIV. p. 242. b. Equus nili, inquit, animal aquaticum est de natura et genere cocodrillorum: crura enim et dentes habet sicut cocodrillus, et sunt multo majora. Est autem animal crudelissimum et hominibus occidens et navibus subvertebndis cupidissimum. Uno enim pede in terra defixo alterum immittit navi et in impetu vel subvertit eam vel lacerat: nec capi de facili potest nisi catenis reticulatis, et cum capitur non nisi malleis ferreis occiditur: cutem enim habet spissam fere ad cubitum et est fortissima. Equus fluminis dicitur esse animal aquaticum in portibus nostris (Orientis legendum est) in terra et in aqua valens; habet autem crines ut equus, sed pedes fissos cum ungulis ut vacca, et est sublimis faciei. caudam habet ut porcus, et hinnit ut equus, et est valde grossi corii. Magnitudo autem ejus est ut asini. Denique idem *Albertus* p. 243. a. sub nomine Hipodromi eandem belluam describit, sed in multis diversam a notitia Gallici scriptoris. Hipodromus, inquit, bellua est aquatica, ut dicit *Plinius*, quam cum quinque cocodrillis Scaurus romanis lusibus intulit. Hic in Nilo flumine versus aequinoctialem habitat, et in India praecipue invenitur. In terra autem nascitur, et in terra et in aqua aequaliter valet. est autem aliquando major elephanto. Habet autem rostrum resupinatum; unguis bifidus ut bos, caudam tortuosam, dentes prurigineos aduncos, aprorum dentibus similes: dorso vero et hinnitu est sicut equus. Noctibus depascit segetes et ad ipsas pergit retrograde; ut vestigia occultet, ne sibi revertenti parentur insidiae venatorum. Haec bestia cum multo vadit grege et arundines recenter caesas avidissime petit, vel aculeos spinarum. In talibus enim ita diu volutatur, donec vulneretur in quadam sui pedis vena, cuius sanguinatione macerari appetit; libentius enim prae ceteris partibus

tibus in pede plagam recipit, et hanc receptam diligenter curat. Haec bestia dorso est impenetrabilis, nisi forte cum aqua madet. Ex hujus cute bestiae hastae tornantur, quod valde spissa est ut dicit *Plinius*. Multa his insunt falsa plane et inepta; quaedam tamen ex historia Rosmari nobis dicti immista esse suspicari possit aliquis, nisi eadem plane de periculo navibus a furore hippopotami imminentे ex itinerariis variis retulisset illustris *Buffonius*. In comparatione crurum, pedum et unguium (pro quibus *Albertus* male dentes posuisse videtur) cum crocodilo, quae *Alberto* imposuit, ut ex genere crocodilorum esse hippopotatum male diceret, non immerito suspiceris veram pedis unguilarumque naturam quadrifidam ut in crocodili pedibus exprefsam esse. Quatuor enim digitos pedibus hippopotami inesse uti crocodili posuit etiam *Thevenot* in Itinerario T. I. p. 491. Attamen re ipsa pedes crocodili anteriores quinquefariam fissi, sed unguibus tres modo digitii armati sunt.

Atque haec fere sunt loca scriptorum veterum et medii aevi omnia, quae de forma et natura hippopotami tradunt; quorum partem postremam, quoniam in libris *Conradi Gesneri* et *Ulyssis Aldrovandi* non exstat, scriptoribus ipsis post eorum libros editis, plane omiserunt aut ignorarunt scriptores historiae naturalis recentiores. Hinc factum est, ut errores *Herodoti*, *Aristotelis* et *Plinii* ubique repeterentur et accusarentur, accuratoris vero notitiae a *Tatio* relictae nemo meminisset. Atque adeo ipsa *Herodoti*, *Aristotelis* et *Plinii* loca *Conradus Gesnerus* noster, non ea cum cura et critica diligentia, cuius laude alias excellit, videtur tractasse, comparasse atque illustrasse. Multo etiam longius ab hac diligentiae criticae laude abest *S. Bochartus* in Hierozoico II. p. 754 sqq. Quocirca non mirum est eandem negligentiam confundi in eorum scriptis, qui copiis *Gesneri* paratis uti, quam ipsi loca scriptorum veterum curatius inspicere atque excutere malebant. Haec praecipue de illustris *Buffoni* historia animalium tam gallica quam germanica intelligi volo; nam qui post eum scripsérunt, non omnem belluae historiam tam litterariam quam naturalem complecti sed visa modo a se, aut quae comparatis recentiorum auctorum locis observasse sibi videbantur, prodere voluerunt.

Postquam

Postquam igitur veterum notitias scriptas explicui supereft, ut quae nobis antiquitas in variis operibus arte factis et monumentis formae immanis belluae argumenta et signa reliquerit, exponam breviter. Qua quidem in tractatione vereor, ut lectorum omnium desiderio satisfaciam. Plurimis enim libris, qui numos et picturas veteres recensent, invitus hic careo; praecipua tamen monumenta saltim indicabo, recentissima denique gemina oculis lectorum coelo repeatita exponam. Reliqua ut ingenium alicujus *Heynianae* disciplinae alumni Goettingae copiis litterariis abundans suppleat, magnopere exopto!

Primus igitur *Bellonius* cum hippopotamo a se Byzantii viso comparavit fol. 25. figuram ex Colosso Vaticano, qui Nilum refert, excerptam, quam ex *Bellonio* retulit etiam *Conr. Gesnerus* in librum de Aquatilibus p. 494. In ea hippopotamus crocodilum dentibus prehensum transversum tenet, pedibus omnibus quinquefariam fisis. Deinde posuit picturam ex facie aversa numi Hadriani Imperatoris, ubi Hadrianus sedens, sphingi innititur, dextra tenens cornu copiae; circa basin crocodilus et hippopotamus apparent. Addit supereffe multa alia argentea et aerea numismata, in quibus eadem bellua sit similiter expressa, addita interdum ibide. In figura a *Bellonio* apposita fol. 23. pedes antici obtecti latent, posteriores vero quinos digitos habent; frons supina, seu devexa ut in delphine veterum, simone etiam dicto a frontis hac forma, manifeste conspicitur, rictus ingens, cauda et aures breves; pilorum et juba nulla apparent vestigia.

Hanc alteram picturam etiam in librum suum retulit *Conr. Gesnerus* p. 495. Tertio loco *Pierius* in opere portentoso de Hieroglyphicis litteris Aureoli tyranni tumulum ad pontem Aureolum Infubriae supereffe refert, a Claudio Caesare sex elegorum epitaphio nobilitatum, in cuius conditorii parte prima hippopotamus sit incisus, quem serpens cauda mordicus apprehensa complectitur. Hoc epitaphium publicavit *Gruterus* Inscription. p. 163. et retulit in Analecta V. P. Graec. T. III. pag. 285. V. C. Brunckius. Operibus antiquis, quae res Aegypti respiciunt aut tradunt, plerisque ineft hippopotami figura, hinc etiam numis, de quibus vide *Spanheimii* Dissertationem IV. p. 172. et nuperum Lexicon numismaticum sub nomine Aegypti.

In

In opere musivo Praenestino tres figurae ejusdem animalis cum adscripto *χοιροπόταμος* nomine pictae conspiciuntur, sine dentibus exsertis, quas figurae illi, quam veluti choeropotami dedit *Prosper Alpinus Rerum Aegypt. IV. cap. 12.* plane similes esse pronunciavit Cl. *Io. Hermann in Comment. Tabulae Affinitat. p. 97.* Scilicet *Prosper Alpinus Histor. natural. Aegypti p. 245.* ed. Leidensis 1735. tab. 22. fig. 1. et 2. Choeropotatum matrem cum pullo utero exsectori pinxit, quorum pellem farctam in Aegypto viderat, veluti ab hippopotamo diversam, dentibus non exsertis, sed aequalibus et confertis, facie non sima, sed magis rotunda oblonga, statura porcina, pedibus brevibus, digitis anteriorum pedum quaternis, posteriorum quinis, bene fissis, longisque et acutis unguibus instructum. Contra hippopotatum verum et caput cum dentibus separatim pinxit in tab. 23. 24. 25. omnium pedum digitis quaternis, parum fissis, unguibus non exstantibus. Verum has picturas ipse se a pictore perito accepisse fatetur; an ipse animal uspiam viderit, non constat ex ejus relatione. Fidem *Prospero Alpino* adhibet Cl. *Hermannus*, et choeropotatum ab hippopotamo distinguit; verum illustris *Buffonius* picturas ex pelle animalis farcta factas formam belluae male exhibere censet. Possemus etiam suspicari *Prosperum* nominis diversitate falso fuisse. *Bellonius* enim in Observationibus tradit Italos, qui Constantinopoli degunt, belluam hanc appellare bovem marinum; Graecos contra ac Turcas sua quosque lingua porcum marinum. Idem tradit *Jacobus Gassot* in Itinerario. Contra in ipsa Aegypto equum marinum nominari testatur egregiae notitiae auctor *Fridericus Zerrenghi da Varni*, medicus Neapolitanus in libro 1603. edito. Sed difficile est fidem plane abrogare *Prospero Alpino*, et si verum hippopotatum num ipse viderit unquam, non constat; picturam enim non ineptam a pictore habuit. Contra choeropotatum ipse vidit, seu potius pellem animalis farctam, cuius picturam fidelem dare se asserit. Quam etiamsi male factam esse concedo lubens contendenti, tota tamen forma capit is, figuraque dentium et pedum plane diversum ab hippopotamo animal arguit; cui quam similis sit figura choeropotami in opere musivo Praenestino expressa, ipse judicare nunc non possum. Exemplo enim ejus careo, quod exstat cum commen-  
tario ex *Montfauconio* repetitum apud *Schaeff Travels p. 423. seqq.*

cum notis *Barthelemii* in Memoires de l' Academie des Belles Lettres Tom. XXX. p. 503. seqq. Ipse olim Argentorati in bibliotheca Academica vidi exemplum ex opere ipso Romae transcriptum et vivis coloribus pictum; (conf. ad Oppianum notam pag. 372.) verum his omnibus exemplis parum fidei habeo, quod multa in eo opere mutata et praepostere locata fuerunt electra, dum egregium monumen-  
tum Romam transferendum eximebatur. Recentissime edita est pictura hippopotami ex gemma caelata transsumta in Collectione Ducis Aurelianensis T. II. tab. 62. quam ex opere egregio transcriptam beneficio illustris *Heynii* nactus lectoribus hic ob oculos pono. Editor Gallus adjunxit brevem *Daubentonii* dissertationem, ubi inprimis veterum auctorum notitiae a recentioribus diversae annotantur. Verum et si vir doctus locum *Achillis Tatii* annotavit, recte tamen eo non usus est, non magis quam *Bochartus*. Optime tamen monet, accuratam hippopotami notitiam peti debere ex reliquis quae habe-  
mus Aegyptiacis monumentis, ex quibus laudat opus musivum Prae-  
nestinum, Basin Nili Vaticani, opus figulinum anaglyphum in *Gorii* Inscriptionibus Etruscis T. I. tab. 19. Museum Capitolinum III. 90. Numos Claudii, Otaciliae, Mammæae et Hadriani, denique Pictu-  
ras Herculaneses T. I. p. 263. Miratur hippopotatum in basi Nili Vaticani (etiam in gemma caelata ducis Aurelianensis) effictum croco-  
dilum mordicus prehensum tenere, cum animal frugivorum a ple-  
risque tradatur. Verum *Zerenghus* is, quem supra laudavi, tradit etiam, sed ex aliena relatione, hippopotatum non solum sata, et oryzam depasci, sed piscibus etiam, carne, cadaveribus victitare, et denique crocodilos etiam devorare, et si dentium formam et naturam magis ad animantium deprædationem quam victum vegetabilem fa-  
ctam et aptam esse putat. Contra Cl. *Sparrmann* in Itinerario Afri-  
cano p. 565. et p. 568. solis herbis victitare asserit, eamque opinio-  
nem confirmare videtur structura ventriculi, quem quadruplicem re-  
perit *Sparrmannus*.

Sed antequam de picturis vetustis judicemus, operae pretium erit varias virorum doctorum notitias cum scriptorum veterum locis comparare. *Bellonius* igitur in libro Observationum gallico folio 103. verso, hippopotamo illi, quem Constantinopoli ex Aegypto allatum  
vide-

viderat, caput enorme fuisse ait, indecentissimum, fere vaccinum, auribus ursinis brevibus ac subrotundis, oris rectu vasto adeo, ut leoninum superare, certe humanum caput aequare posset. Patulas habebat nares, labra repanda atque resima, dentes prorsus equinos, obtusos tamen, oculos ac linguam praegrandes; collum admodum breve, caudam porci aut testudinis, rotundam, reliquum corpus obesiissimi porci videbatur esse; pedes ita breves erant, ut quatuor a terra digitos vix attolleretur; unguiae porci more diffissae, unde melius in aquarum fundo ambulare quam natare belluam arguebat *Bellonius*. Idem deinde in libro Gallico de Piscibus p. 17. seqq. eundem hippopotam fuisse tradit corpore veluti porci optime saginati, undequaque pleni et crassi, et satis proceri; pellis etiam tum colore tum alias cum pelle porci domestici non nigri conveniebat. Hiatus oris tantus erat, ut facile moles aut pila aliqua humano etiam capite major immittetur. Frons erat depressa velut in orca. Dentes habebat equinos, eadem forma, validos, oblongos, e maxillis prominentes, non acutos, ut in animalibus carnivoris; oculos magnos et veluti bubulos, linguam omnino solutam, caudam brevem, rotundam et crassam, tanquam porci aut testudinis potius. Et si bene memini, addit *Bellonius*, pedes quoque porcinis similes habebat, non admodum divisos. Nuper tamen quidam Constantinopoli reversus (*credo Iacobus Gassot*) pedes testudinum pedibus similes in hoc animali se observasse nobis retulit. In his *Bellonii* verbis insunt quaedam, quae primos notitiae de hippopotami forma auctores, ut *Herodotum*, excusare possint, si id agerem nunc ut scriptoribus vetustis studiose excusationem aliquam errorum speciosam conquererem. Potuit enim *Herodotus*, potuit etiam auctor notitiae a *Diodoro*, Siculo, positae, cum primum belluam inspicret, nec pedum formam accurate investigasset, ex non recenti rei olim visae memoria pedem bifidum ei assignare ut *Bellonius*, non spernendus alias historiae naturalis auctor. Frons depressa, velut in orca ex delphinum genere, confirmat notam a veteribus scriptoribus positam, qui faciem hippopotamo simam seu resupinam assignant, cuius exemplum clarissimum ex delphine petere licet, quem ab ea faciei forma veteres simonem appellantur. Atque haec forma frontis subito declivis et depresso appareat etiam in figura numi Hadrianei, et in illa quam ex basi Nili Vaticana re-

petitam lectoribus apposui. Dentes denique equinis similes quod ait esse *Bellonius* et maxillis prominentes, et si eam propter comparationem reprehensionem *Zerenghi* incurrit, aperte tamen caninos tantum incurvatos intelligi voluit, quod fecit etiam *Achilles Tatius*, aut quem is sequitur auctorem, ex quo nondum publicato comparationem non potuit *Bellonius* transferre.

Ipse *Zerenghi* initio narrationis modum capturae eundem plane refert quem *Achilles Tatius*; sed in eo ponit Italus hippopotamum marem et feminam, quibus potitus est, vespere ex terra in fluvium redeuntes in foveam incidisse. Quod si verum et in victu moribusque belluae perpetuum est, male *Plinium* secuti scriptores recentiores aliqui hippopotamum noctu tantum aquis egredi pastum in sata vicina tradiderunt. Sed contrarium docent operosae Cl. *Sparrmanni* observationes. Clamor, quem moribundi edebant, inter hinnitum et mugitum medius, mugitibus tamen bovillis propior erat. Corium crassissimum et densissimum nisi aqua diu emollitum vix telo ullo potest penetrari. Rictus immanis est, pedes in quaternas ungulas fissi, magnitudo equum et bubalum maximum superat, cauda testudinea, sed multo major. Rostrum vel nasus non resimus est, sed similis rostro bubali, multo tamen major. Pro juba equina pili breves et rari in collo adsunt; (qui tamen in corpore reliquo fere toto depili speciem aliquam jubae praebere potuerunt *Herodoto* aliisque.) Vox inter mugitum hinnitumque media est; dentes ore clauso nulli eminent. Ex corio incolae scuta et corrigias varios in usos conficiunt. Pilos in corpore raros et flavescentes vix conspicere statim licet; in collo tamen crassiores paulo adsunt, item rari; in labiis fasciculi pilorum longiorum, crassiorum et duriorum speciem myracum exhibent. Cauda media ad extremum plana ut in anguilla est, cuius in pelle uti etiam in femoribus squamae minutae, albidae et rotundae apparent, lentium grandiorum magnitudine. Easdem squamas licet etiam in pectore, collo et in partibus aliquot capitis conspicere. (Caudam in latere utroque compressam dicit *Sparrmann*.) Aures paulum acutae pilos intus habent breves subtiles et densos, reliquis concolores. Rictus oris formam quadratam habet, dentibus quadraginta quatuor armatus, ex quibus chalybs igniculos elicit.

Ore

Ore clauso labia praegrandia dentes omnes operiunt. Forma anima-  
lis quodammodo media inter bubalum et porcum potest dici. Color  
corporis est fuscus; pullum unum parere dicitur. Denique marem  
femina majorem esse tertia magnitudinis parte asserit *Zerenghi*;  
in cuius descriptione rictus oris quadratus egregie confirmat notam  
ab *Achille Tatio* positam, quae maxillis aequalem cum genis latitu-  
dinem assignat. Aliter enim rictus quadratus effici aut dici non  
potest. Hinnitum fere equinum, sed longe fortiorum edere praeter  
alios testatur etiam diligentissimus *Adanson* in Itinerario Senegalliae  
p. 73. Atque ex hac vocis similitudine sola nomen hippopotami in-  
ditum fuisse animali recte censet *Sparrmann* p. 570.

Desinam in enarrandis judicandisque vetustorum operum pictu-  
ris, quas equidem viderim. *Lucianus* in Praeceptis rhetoricae p.  
311. ed. Graevii. Nilum incumbentem crocodilo aut hippopotamo  
pingi solitum fuisse ait. Talis tamen pictura mihi nondum occurrit.  
Opus anaglyphum figulinum apud *Gorium* l.c. figuram hippopotami  
satis bonam facie firma, aquis ex ore defluentibus fistit; pedes in aquis  
absconditi latent; juba nulla, cauda brevis appetat.

Numus Otaciliae Severae, ex quo figuram hippopotami sed  
priore multo minorem exhibit *Spanheimius*, frontem adeo simam  
non effingit; pedes divisi apparent in plures duabus ungulas, sed ni-  
mis simul fissi videntur esse, quod in Cl. *Allamandi* iconē reprehē-  
dit etiam *Sparrmann*. Rictus plenus dentibus appetat; veram ta-  
men eorum formam in numi brevi spatio nemo sanus requiret. In  
pictura Herculaneensi T. I. p. 263. aquis insistit hippopotamus; pedum  
igitur forma non appetat, rictu magno, aperto, dentibus satis magnis  
et acutis; verum exsertorum nullum appetat vestigium. Facies firma  
est admodum, cauda brevis, extremo fine pilosa. Os quadratum  
videtur arguere narium extremitas in utroque latere protuberans, in-  
flata et sursum reflexa. Hanc iconem una cum altera ex Colosso Va-  
ticano repetitam in fine libri reperiet lector, si librarius sumtum fa-  
cere ejus rei caussa voluerit. Comparare has vetustas figurās cum  
recentioribus ab illustri *Buffono*, *Sparrmanno* et *Forstero* V.V.C.C.  
datis et judicare de iis nimis temerarium esset in homine, qui vivum  
aut mortuum animal nunquam vidit. Hoc tamen fortasse plures me-

cum sentient lectores, quo plures nunc animalis figuræ habemus aere expressas, eo difficilius factum esse judicium de vera totius animalis forma, et si singularum partium figuram proportionemque notitiae satis accuratae abunde docuerunt.

Ruminantium ordini animalium hippopotamum vindicare cibi genus videtur, et ventriculi natura, quem in pullo nondum nato *Daubenton* triplicem, in juniore quadruplicem reperit *Sparrmann*; contra illustris *Gordon* apud *Buffonum* simplicem ventriculum esse asserit, nec herbas decerptas ruminare hippopotamum. Quae diversitas impedit me, quominus alterutram in sententiam eam; nec ipsa ventriculi natura licet uti velut argumento ruminationis certissimo. Sunt enim praeterea multa alia certiora, quae num hippopotamo adsint, plane adhuc ignoramus. De iis ruminantium notis tradi in Promtuario Lipsiensi Histor. naturalis 1787. p. 418 seqq. Paulo postea easdem sed non omnes, explicuit *Müller* in Promtuario Historiae naturalis generalis et Zoologiae, Goettingae edito 1788. Tom. I. P. I. p. 89 seqq.

OBSER-